


Program imunisasi terbesar Covid-19 hujung bulan ini

PUTRAJAYA – Kerajaan akan memulakan roll-out pelaksanaan Program Imunisasi Covid-19 Kebangsaan iaitu program vaksinasi terbesar yang pernah dilaksanakan di negara ini mulai hujung bulan ini.

Sebanyak 26.5 juta individu atau 80 peratus populasi rakyat Malaysia disasar untuk menerima vaksin yang akan diberikan secara percuma dalam program tersebut.

Perdana Menteri, Tan Sri Muhyiddin Yassin berkata, program Imunisasi Covid-19 Kebangsaan itu akan melibatkan tiga fasa dengan fasa pertama membabitkan sejumlah 500,000 petugas barisan hadapan terdiri daripada petugas kesihatan dan petugas bukan kesihatan.

– Beliau berkata, fasa pertama program imunisasi itu dijadualkan tamat pada bulan April depan dan amat penting untuk melindungi barisan petugas ha-



PROGRAM Imunisasi Covid-19 adalah program imunisasi terbesar dalam sejarah negara. – AFP

dapan dalam memerangi pandemik Covid-19.

Menurutnya, sebanyak 9.4 juta orang terdiri daripada kumpulan berisiko tinggi dijangka meneri-

ma vaksin di bawah fasa kedua yang akan berlangsung mulai April hingga Ogos depan.

“Fasa kedua ini melibatkan warga emas dan golongan rentan

berusia 60 tahun ke atas, yang ada masalah morbiditi seperti penyakit jantung, obesiti, diabetes dan tekanan darah tinggi selain golongan orang kelainan upaya (OKU).

“Baki penerima vaksin dalam fasa ketiga merupakan golongan dewasa berumur 18 tahun ke atas yang akan bermula dari bulan Mei depan hingga Februari 2022. Fasa ini penting untuk membentuk perlindungan kelompok dan seterusnya mengawal pandemik ini secara menyeluruh,” katanya.

Beliau berkata demikian semasa menyampaikan perutusan khas penjelasan pelaksanaan Proklamasi Darurat dan Pemasyuran Ordinan Darurat dalam mengurus pandemik Covid-19 di saluran televisyen semalam.

Muhyiddin berkata, Jemaah Menteri bersetuju melantik Menteri Sains, Teknologi dan Inovasi, Khairy Jamaluddin Abu Bakar

sebagai Menteri Penyelaras Program Imunisasi Covid-19 Kebangsaan bagi memastikan program imunisasi itu dilaksanakan secara teratur.

“Beliau akan ketua satu Pasukan Petugas Khas yang menguruskan pelaksanaan Program Imunisasi Covid-19 Kebangsaan khususnya isu-isu berkaitan logistik dan penyelarasan dengan negeri-negeri dan agensi-agensi kerajaan,” jelasnya.

Muhyiddin berkata, lebih 600 pusat simpanan yang juga pusat pemberian vaksin akan dibuka di seluruh negara bagi memastikan program itu berjalan dengan lancar, teratur serta memudahkan orang ramai.

“Maklumat lanjut mengenai Program Imunisasi Covid-19 Kebangsaan termasuklah mengenai tatacara pendaftaran, lokasi pusat pemberian vaksin serta informasi lain yang berkaitan akan dimaklumkan nanti,” ujarnya.